

Jangan Ambil Ringan Keamanan Dan Kemakmuran Dikecapi Negara Hari Ini
Bernama
20 Februari , 2012

SEMPORNA, 20 Feb (Bernama) -- Rakyat diingatkan supaya tidak memandang ringan keamanan dan kemakmuran yang negara dan mereka kecapai hari ini dengan melakukan perkara-perkara yang boleh mengganggu gugat suasana itu.

Menteri Kemajuan Luar Bandar dan Wilayah Datuk Seri Shafei Apdal yang juga Naib Presiden Umno berkata rakyat perlu mensyukuri segala nikmat yang dikecapi mereka dalam suasana negara aman selama ini dengan berusaha mempertahankannya, kerana negara tidak mudah dipulihkan apabila berlaku kacau bilau.

"Saya berharap rakyat Malaysia di negara kita harus memelihara kesejahteraan dan keamanan di negara kita yang saya percaya bukan mudah untuk kita sampai ke tahap ini, dalam keadaan masyarakat pelbagai kaum, pelbagai anutan agama yang terdapat di negara kita.

"Kita jangan ambil ringan kerana apabila sudah berlaku huru-hara, bukan mudah untuk memulihkannya. Kita lihat beberapa negara, bukan sahaja di Afrika tetapi juga di Timur Tengah, keadaannya terumbang-ambing. Untuk memulihkan keadaan itu kepada yang stabil apa lagi untuk membangunkan negara mereka bukan mudah. Ia perlu mengambil masa bertahun-tahun untuk kembali kepada keadaan asal," katanya.

Beliau yang juga anggota parlimen Semporna berkata demikian kepada pemberita selepas merasmikan program Sambutan Maulidur Rasul Peringkat daerah Semporna di sini hari ini. Turut hadir ialah Menteri di Jabatan Ketua Menteri Sabah Datuk Seri Nasir Tun Sakaran.

---BERNAMA

Hakcipta © 2012 BERNAMA

Source:<http://www.bernama.com/bernama/v6/bm/newsindex.php?id=646714>